

**Naaja H. Nathanielsen
Attaviitsoq**

**UPA 2016/143
30. maj 2016**

Qanoq iliornikkut sulinerup imminut akilersinnaasunngorlugu aaqqiivigineqarnissaa, isumaginninnikkullu ikiorsiissutit sulileqqinnissamut aporfujunnaarlugit aaqqiivigineqarnissaat pillugu apeqquteqaat aallaavigalugu oqallinnissamik siunnersuut

(Inatsisartunut ilaasortaq Anthon Frederiksen, Partii Naleraq)

Siullermik akileraartarnikkut aaqqissuusseqqinneq sulinissamut kajumilersitsinerusup pilersinnissaa pisariaqarpoq. Taamatut aaqqissuusseqqinneq tamanna pillugu politikikkut aalajangivinnermik kinguneqartoq ukiorpassuarni oqallisigaarput. Maluginiarpara, Aningaasaqarnermut Naalackersuisoq ataatsimeersuarnermi angisuumi Nuummi pisumi oqartoq, ikinnerussuteqartut inuiaallu ikinnerussuteqartut aaqqissuusseqqinnernik unitsitsisuusut, aaqqissuusseqqinnerit sunnernerlunneqartarnerat akueriumannginnamikku. Isumaqarpunga taamatut oqarneq paasinanngilluinnarpoq. Ikinnerussuteqartut unitsitsisinnaapput, amerlanerussuteqartunit isumaqatigineqarunik. Ajornartorsiut tassaagunarpoq, politikikkut aaqqissuusseqqinnerit sorliit aallartinneqassanersut isumaqatigiinngissutigineqarsinnaammata. Naalackersuisooqatigiit kingulliit marluk aaqqissuusseqqinnerit aningaasarsiortuaqqanik sunniisut aallartissimavaat, akunnattumillu akissarsialinnik pigissaarnerusunillu attuisut kinguartinngikkunik itigartissimallugit. Taamaattumik Naalackersuisut ujartugaattut pitsaanerusemik oqalliseriaaseqarnermik kulturi kisimi atorfissaqartinneqanngilaq. Nutaamik politikikkut kultureqarneq ikinnerussuteqartunik qaaqquisoq piviusumillu aaqqissuusseqqinnernik sunneeqataaffiusinnaasoq atorfissaqartinneqarpoq, taamaasilluni siammasinnerusunik isumaqatigiissuteqartoqarniassamat.

Taassuma saniatigut sulisinnaasut nuttarsinnaanerat pillugu eqqartuinissaq pisariaqarpoq. Sulisinnaasut suliffissalinnut nuttassasut eqqartorparput taassumalu qaavatigut tamatuminnga siuarsaanissamut aningaasanik atugassiisoqarsimalluni. Kisianni eqqartunngisaannarparput, illoqarfigisamiit imaluunniit nunaqarfigisamiit allamut nuunneq sunik nassataqarnersoq. Taamatut tigussaasumik nuunneq timimut tunngassuteqaannanngilaq. Aamma tarnimut tunngassuteqarpoq. Inunnut ataasiakkaanut nuunnerup kingorna naleqqussarnissamut annertoorujussuarmik piumasaqaateqarpoq. Meeqqat atuarfimmi nutaami aallartittussaapput, tamannalu meeqqamut annertoorujussuuvoq. Inersimasut nutaanik ikinngutitaartussaapput nuuffimminnilu tukkiartuaartariaqarlutik. Tamanna aamma oqimaappoq. Taamaattumik nuunnerup qanoq piviusumik nassataqartarnera pillugu uittariaqarpugut eqqartorlutigulu, taamatut nuunnerup nutaap sapinngisaaq tamakkerlugu asattuarmik pinissaanut qanoq isiussanerluta. Suliaq tamanna kommuninit, suliffeqarfinit nuuffiusunit inuiaqatigiinnullu nuuffiusunut nuuttunik pisuunnguallatsitsisunik kivinneqassaaq. Taamaattumik nuunnermut periusissiaqarnissaaq nuuttunillu periusissiaq nuunnissamik aalajangernermik sunnuteqartussanik qanoq isionnissamik imaqartut pitsaassapput. Aamma misigissutsit aningaasaannanngitsullu pineqarnerat nassuerutigissavarput.

Alla tassaavoq, suliffeqarfinni atorfinititsinermut tunngavigineqartut pitsaasuussapput. Tamatumani isumaqarpunga, sulisoqarnermi illuatungeriit tamatuma inissinnissaanut akisussaaffeqartut. Suliffeqarneq piffissap qanoq ilinera apeqqutaatillugu suliffissaqartartumi ilinniarsimannngitsunillu amerlasuunik sulisoqartumi, tamanna pillugu atugassarititaasut

pitsaasut qulakkeerneqarnissaat pisariaqartinneqartorujussuuvoq. Isumaqaatigiissutit pillugit ajornartorsiutit, sulisussaaleqineq suliffeqarfinnilu aaqqiagiinnginnerit uteqattaartuarlugit tusartuakkat. Ingerlaqqittariaqarpugut nassuerutigalugulu, suliffeqarfiit sulisunik aalajaatsunik pisariaqartitsinerat sulisullu atugassartitaasunik pitsaasunik pisariaqartitsinerat.

Inuiaqatigiittut aamma nunap matuma innuttaanut ersarissunik sunik naatsorsuuteqarnitsinnik piunasaqassaagut. Nunap Karsia karsiunngilaq angakkuarluni nammineerluni immertartoq. Sulinikkut immerneqassaaq. Sulinerlu kisimi inuiaqatigiinni kiffartuussinnermi akilersinnaavoq. Taamaattumik immitsinnut nammineq aamma tamatta immitsinnut sulisinnaasut tamatta sulinissarput piunasaarisariaqarparput. Meeqqat atuarfiata pilersaaruteqarani, ilinniaqqinnissamik pilersaaruteqarani imaluunniit suliffissaqarani qimannissaa ajornartariaqarpoq. Meeqqat atuarfianniit ilinniartutut imaluunniit suliffeqartutut inuunissamut pitsaanerujussuarmik ikaarsaariarfeqarnissaa pisariaqartinneqarpoq. Niviarsiaq 15-inik ukiulik nammineertillugu immiiniiginnarneqassanngilaq – taamatut pisoqassappat aqqisuussaanermi sumiginnaaneruvoq.

Kiisalu inatsisit imminnut akerlilersortut iluarsaannissaat soorunami pingaaruteqarpoq. Taamaattumik inunnik isumaginninnermi aqqissuusseqqinnissaa aamma pingaaruteqarpoq. Suliffissaaleqisullu qaffassarnissaa pisariaqartinneqarpat, tamanna isumaqartussaavoq. Suliffissaaleqisunut pikkorissartitsissanngilagut suliffittaartitsissutaasinnaangitsunik. Iliuserineqartut assigiinngitsut nalilersorneqarnerat sunik takussutissiinersoq tusassallugu soqutiginarpoq. Suut atorsinnaappat suullu atorsinnaanngillat? Tamakku tamarmik saqqummiunneqartariaqarput, ilisimasat ataatsimoortillugit sulisitsisut, kommunit, sulisut aamma Namminersorlutik Oqartussat akornnganni avitseqatigiissutigineqarniassammata.

Qulequttap matuma oqallisigineqarnissaanik periarfissaqarnermut qujanaq.